



SAKSPAPIR

Saksnr	Utval	Type	Dato
19/2018	Levekårsutvalet	PS	11.06.2018

Sakshandsamar	Arkiv	ArkivsakID
Solrun Hauglum		18/719

HØYRING - UTVIKLINGSPLAN 2035 HELSE BERGEN HF

Vedlegg:

Utkast til Utviklingsplan 2035 Helse Bergen HF

Rådmannen sitt framlegg til vedtak:

Administrasjonen får fullmakt til å levera høyringsuttale til Utviklingsplan 2035 Helse Bergen HF med fokus på følgjande:

1. Viktigheita av godt samarbeid og god samhandling mellom spesialisthelsetenesta og kommunehelsetenesta.
2. Eventuelle konsekvensar innretning av spesialisthelsetenesta vil ha for innbyggjarar eller tenester i kommunen.

Levekårsutvalet - Sak 19/2018

LEV - Behandling:

Samrøystes vedtak.

LEV - Vedtak:

Administrasjonen får fullmakt til å levera høyringsuttale til Utviklingsplan 2035 Helse Bergen HF med fokus på følgjande:

1. Viktigheita av godt samarbeid og god samhandling mellom spesialisthelsetenesta og kommunehelsetenesta.
2. Eventuelle konsekvensar innretning av spesialisthelsetenesta vil ha for innbyggjarar eller tenester i kommunen.

Saksopplysningar:

Nasjonal helse- og sjukehusplan (Meld. St. 11 2015-2016) legg til grunn at alle helseføretak skal utarbeida utviklingsplanar. Utviklingsplanen skal gi føringar for korleis føretaket skal utvikla seg for å kunne møta dei framtidige behova for helsetenester innanfor rammene for verksemda. Den nasjonale rettleiaren for arbeid med utviklingsplanar har vore utgangspunkt for arbeidet med utviklingsplan saman med føringar frå Helse Vest RHF. Arbeidet har vore forankra i toppleiinga med

styringsgruppe og prosjektgruppe. Det har vore medverknad frå brukarråd, tilsette sine representantar, utdanningsinstitusjonar, fagmiljø og frå kommunane. Kommunane har medverka gjennom to halvdags arbeidsmøte, og prosjektleiar har vore i møte med dei fire samarbeidsråda.

Planen presenterar no-situasjonen i Helse Bergen, strategiar og føringar og utviklingstrekk, analyserar moglegheiter og gir oversikt over 13 grep ein vil ta framover. Det klare målet er at ein skal skapa pasienten si helseteneste. For å nå det målet, må ein førebyggja (dempa veksten i behov for tenester), forbetra (sjå etter andre måtar å yta tenester på og bruka ressursane betre) og prioritera (fordela ressursar på ein open og rettferdig måte).

Innbyggjarar over 67 år vil i 2035 utgjera 17,6 % av befolkninga i Helse Bergen sitt område, d.v.s. ein vekst på 63,5 % i perioden 2015 til 2035. Sjukdom som heng saman med aldring vert sett på som den første store utfordringa i sjukdomsutviklinga. Den andre store utfordringa er førekomsten av samansette tilstandar, d.v.s. fleire sjukdomar samstundes. Den tredje og truleg største utfordringa vert antibiotikaresistens og pandemifare. Andre utfordringar er innbyggjarane sine høge forventningar til servicenivå og å få tilsett og holdt på nok personell med rett kompetanse. Økonomiske analyser tyder også på å auka aktivitet samstundes med at ein får strammare rammer.

Det vert skissert 13 grep for å møta behovet for helsetenester:

1. Laga eit heilskapleg tilbod med fokus på tidleg intervensjon til barn og unge i BUS.
2. Forbetra og integrera tilbodet til pasientar i psykisk helsevern og tverrfagleg spesialisert rusbehandling.
3. Auka samhandlinga kring pasientar med somatisk/psykisk lidning og rusproblem.
4. Greia ut korleis tilbodet til eldre kan samordnast betre.
5. Forbetra samhandlinga kring pasientane saman med dei 24 kommunane i føretaksområdet.
6. Koordinera og styrka vår innsats i læring, meistring og førebyggjande medisin.
7. Vidareutvikla sengepostane for å sikra eit godt tilbod til dei inneliggjande pasientane.
8. Utvikla det polikliniske pasienttilbodet generelt, og i Sentralblokk spesieilt.
9. Forbetra bruken av operasjonskapasiteten.
10. Leggja til rette for vidare utvikling og rett bruk av laboratorietenester og bildediagnostikk.
11. Vidareutvikla regionssjukehuset og samhandlinga med dei andre sjukehusa i regionen.
12. Sikra gode prehospitala tenester.
13. Andre, større organisasjons- og investeringsprosjekt.

Etter attendemelding frå kommunane er høyringsfristen utsett til 24.08.2018.

Bakgrunn

Helse Bergen HF vart oppretta i 2002, og var ei samling av 11 sjølvstendige institusjonar der Haukeland universitetssjukehus var den største. I åra etterpå har desse institusjonane vorte integrerte både juridisk og i dagleg drift. Voss sjukehus består som lokalsjukehus, men aktiviteten er tett integrert med aktiviteten i Bergen.

Helse Bergen HF har tidlegare utarbeida fireårige strategiplanar og ei rekkje ulike delstrategiar/planverk. Strategi for 2017 – 2022 er vedteken av styret i føretaket og inngår som ein del av grunnlaget for utviklingsplanen.

Vurdering

Endringar innan spesialisthelsetenesta vil gi direkte konsekvensar for innbyggjarane og for helsetenesta i kommunen. Det er positivt at kommunane har vorte inviterte til dialogmøte i prosessen med å utarbeida utviklingsplan, og administrasjonen i Vaksdal kommune ønskjer å gi

høyringsuttale til utviklingsplanen. Høyringsdokumentet vart motteke ein dag etter skrivefrist og kort tid før utsending av sakene til møtet, så administrasjonen må få setja seg betre inn i saka for å utforma høyringsuttale og få oversikt over planen og konsekvensar for innbyggjarar og kommunehelseteneste.